



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim




tir_yimyim



tir yimyim

TAPAK 8



Putin-i Japan asana mangatettep aliba
asetkong semdang, Tokyo mepelar



Canadian Open: Swiatek aser
Rybakina na final asayatsü

VOL. XXIII ISSUE NO. 302 (ADOK 302) DIMAPUR ROGONÜ (FRIDAY) LUROI (AUGUST) 14, 2026

₹ 5.00

High Court-i Nagaland nung PGTs 84 indang seniority ken o tembangtsüogo

Dimapur, Luroi/August 13 (TYO): Nagaland nung contract nung tesayur inyaker 23 regular kumtsüba aser seniority nung züngshiba anema post-graduate teachers (PGTs) 84-i tezüluba nung agütsüba Gauhati High Court, Kohima Bench mejembitsü lemtet aser iba ken o kanga menur benoker ta ashi. Court-i August 10 nü obendang aser totuyuba agütsüba nung, 2011, 2016 aser 2018 nung seniority list adoktsüba anema kechiba parnoki menokdak mesüra mapang latetja aliba mapang parnoki kechiba anema menokdak ta asüba onük parnoki temulung asütsüsa rasaa meshitet, ta ashi.

Petition agütsür tesayur 84 ya Department of School Education kübok PGTs ama inyaker aser Nagaland Public Service Commission (NPSC) ajanga mapa nung regular yimya nung aniochtsü March 21, 2011 nü sangdong ka agüja liasü.

Parnoki private respondents 23 regular kumtsüba aser seniority lists atema sorkari sangdong agütsüba anema nokdak aser tesayur 23 tenüng ya 2016 aser 2018 nung adoktsüba 'tentative seniority lists' nungi indokjang ta ken o benoka liasü.

Private respondents 23 ya mezüngbo contract nung 2000 aser 2003 nung shim aser iba sülen Cabinet telemtetba ka ajanga regular kumtsü.

2008 NPSC batch nungi mezüng PGTs telok yagi private respondents indang regular kumtsüba anogo anema ken o benoka liasü, ta court-i ashi. Iba temepishiba ya April 22, 2014 nü tembanga state dang parnok regularisation anogo January 18, 2011 asütsü totuyuba agüja liasü.

Coordinate Bench ajanga iba ken o angadangba mapang private

respondents tem regular kumtsüba nung ozüng alema inyakba kecha mali ta bushitet, ta court-i ashi. Taoba obendang agütsüba mapang tang ken o nung petition agütsürtem service nung shimoker liasü. Telok anaprong ya department kasa nung külemi inyaker asünung, tang ken o benoker temi taoba mapang ken o jembiba memetet ta agizüchtsü tasak ta court-i ashi.

Court-isa 'tentative seniority lists' ya nüngdakba ketdangsürtem tsüngta lemsatapa tai aputsü aser representations atema mapang latettsü ta ashi.

Ajisüaka May 11, 2018 nü sangdongba seniority lists anema petitioners temi representation mesüra tai apuba ken o kecha magütsü. Iba sangdong agütsür küm tenet süyir petitioners temi 2025 nung court dangi aru, ta court-i ashi.

Petition agütsürtem pei temeden nung mejanga liasü aser private respondents tem parnok dang temaba jenjangi atutsü ta angatetba sülen ang court dangi aru ta ashi.

2018 seniority list ya tatembang kati aruadokogo aser menur ken o benoka obendang magütsütettsü ta court-i ashi.

"Menua aliba ajanga ochi madak takok angu" ta court-i ashi aser pei temeden madak mejanga alir ka nem akhi mapang tembanger aliba seniority position nung meinprongtsü memelatettsü ta ashi.

Parnok service-i maidang atalokba administrative mapa nung ajemdaker Article 16 kübok par fundamental right to seniority nung aibelenogo ta petitioners temi meshitettsü, ta court-isa ashi.

Anungji mapang kanga menuba mechi iba writ petition ken o tembangtsür, ta court totuyuba nung ashi.

MP Supongmeren-i Dimapur Airport atema tanüngba ali agütsütsü ajungshi

Dimapur, Luroi/August 13 (TYO): Member of Parliament (Lok Sabha) aser Airport Advisory Committee, Dimapur Airport indang chairman, S. Supongmeren Jamir-i Union Home Minister dang Dimapur Airport yanglutsü aser ulushitsü atema tang Assam Rifles Training Centre and School (ARTC&S), 3rd Mile, Chümoukedima kübok aliba tanüngba ali ya Airports Authority of India nem agütsütsü ajungshia liasü.

Pai Union Home Minister dangi tezüluba nung takhangba agütsüba nung Dimapur Airfield dak sendakba otsü balala lemsatapa liasü.

Dimapur Airfield indang ali

392.72 acres shi Defence Estates Officer (DEO), Jorhat Circle ajanga 1987 nung National Airports Authority (NAA), tang AAI, nem agüja liasü. February 29, 2024 nü Joint Survey-cum-Verification Report ka nung ali 148.58 acres shi Assam Rifles Training Centre and School (ARTC&S), Chümoukedima-i agia lir ta jangjatet.

May 8, 2026 nü ARTC&S kübok aliba ali 18.8 acres shi AAI nem Dimapur Airport Phase-I terenlok atema amoktsü.

Anungji tanüngba ali 129.68 acres ya tekeratiba nung AAI nem agüjang ta MP S. Supongmeren Jamir-i Union Home Minister dang ashi.

Power sector nung Nagaland aser NETC lungjemtsü lenmang bushir

Dimapur, Luroi/August 13 (TYO): Principal Secretary and Development Commissioner, Nagaland, Y. Kikheto Sema, IAS-i August 13, 2026 nü Nagaland Civil Secretariat, Kohima nung pa indang office chamber nung Jai Shankar, Managing Director NETC-i anir North East Transmission Company Limited (NETC) ketdangsürtem den senden ka mena liasü.

Iba senden nung Nagaland indang power sector nung lungjemer inyachtsü aser investment maongka atema jembiba aser talisa transmission infrastructure tashi itshitsü, rebewable energy generation, battery energy storage aser tanga kasa tejangraba alibattem nung rangloker jembishinüa liasü.

Principal Secretary & Development Commissioner, Y. Kikheto Sema, IAS-i Nagaland indang power sector nung rongsen tali indoktsü aser lungjemer inyachtsü ayongzüik aser industry aintsü, healthcare, employment aser lenla ajunga nung terenlok asoshi power junga alitsü nüngdaker ta ashi.

Sema-i state nung renewable-energy nukla tulu aliba, talisa solar aser hydro indang lemsatapa aser Nagaland ya maneni tangalen nungi aliba power nung metaloka alir ta ashi.

Nagaland nung power ya 193 MW shi nüngdaker aser State telungzüik nungi 20 MW shi adokdaksür, koba nüngdaka aliba shilem 10 shi dang lir, ta pai ashi.

State nung generation capacity ya 29.4 MW inoka lir saka shidakba nung 20 MW shi

adokdaksür.

Ano 202 MW Nagaland indang share allocation ajanga central sector projects nungi arur aser yangji NEEPCO, NHPC, NTPC aser OTPC dena lir.

Transmission aser storage infrastructure teperi agi yarisema State nung solar, hydro aser hybrid energy projects tem densema 'innovative and sustainable solutions' bushitsü nüngdaker, ta Sema-i ashi. Industries atsür arutsü aser rongsenketzüng maongka adokdaksütsü atema power generation ya tongtipang tamendak dak ama angatettsüla, ta pai ashi.

NETC inyakyim pelashishia agizükdang Sema-i company dang shimtsü akokba lenmang tejangja agütsütsü, Nagaland indang power sector tashi itshitsü nukjidong nung külemi inyachtsü proposals agütsütsü ayongzüika liasü.

State nung amshitsü akokba energy agitettsü lenmangtem aser tangalen nungi bener aruba power nung metaloka aliba ajemtsü partnership models tajung asadangtsü sorkari mulunga lir, ta pai ashi.

NETC Managing Director Jai Shankar-ia state sorkari den lungjemer inyachtsü company tejangraba aliba aser Nagaland indang transmission systems, renewable energy development aser power infrastructure aser battery energy storage densema power infrastructure tashi itshitsü asoshi lenmang bushitsü jangra aliba lemsatapa liasü.

NETC-i Nagaland ya 'external partner' ka ama kisüng masü saka company indang mangdang nung stakeholder ka ama repranger

asere infrastructure development atema lungjemer inyachtsü nung rangloker, ta Shankar-i ashi.

Renewable energy ulushiba den transmission aser transformation capacity tashi itshia Nagaland energy landscape tajungba kuma melenshitsü asoshi renemtsü nüngdakba indang pai ashi.

Storage system teperi agi yaria hydro, solar, wind, gas aser tanga sources tem meyoktepa amshinung ajungtsü ta pai ashi.

Transmission lines aser substations, renewable energy projects, battery storage systems aser hybrid energy projects densema NETC-i maparen balala nung teka amteper inyachtsü asatangtar.

Shankar-i NETC aser state sorkar nungi shilem agia transmission infrastructure aser associated substations külemi yanglutsü atema Special Purpose Vehicle (SPV) ka tentet nung ajungtsü ta ashi.

Pai ano solar aser hybrid projects tem storage systems den lungjemdaksüba nung rongsen indoktsü ya külemi inyachtsü mapa tongtipang ka asütsü ta ashi.

Paisa state nung hydro aser solar tsütsü temulung agüja renewable energy nung ranglok nung ajungtsü aser ibaji ajanga state nung peria agir tangalen yoka rongsen lenmang tajungba akumtsü ta ashi.

Iba senden nung Principal Secretary, Power, KD Vizo; OSD Finance, Ketoulhou Metha aser Head, HR & BD (Corporate), NETC, Riteish Kumar nungeria Nagaland nung power infrastructure indang tasa balala lemsatapa liasü.

Nagaland nung Independence Day atema renemshir

Dimapur, Luroi/August 13 (TYO): Linük ajunga den külemi Nagaland nunga August 15, 2026 nü 80 buba Independence Day meraketa amungtsü renemshiba mapang lir.

State yimtiba, Kohima nung iba sentong ya Nagaland Secretariat Plaza nung anepdang 9:00 ako nung tenzüchtsü.

Iba sentong nung Chief Minister-i linük nisan atsükettsü, State Police, Para Military Forces, Home Guards, Ex-Servicemen, NCC aser tangar temi Guard of Honour agütsütsü. Districts aser Sib-divisions nung Deputy Chief Ministers, Ministers, Advisors

asere ADCs/SDOs temi tesem balala nung linük nisan songa Rashtriya Salute agütsütsü

Ministry of Home Affairs, GoI nungi totuyuba agütsüba ama, taküm Independence Day mapang CM aruba sülen National Song (Vande Mataram) atentsü, aser iba sülen National Flag atsükettsü aser National Anthem atentsü. CM-i jembiba sülen National Song (Vande Mataram) ya ano atentsü aser iba sülen National Anthem ya atentsü.

Iba sülen March Past aser cultural presentation aser südoksünem sentongtem alitsü. Districts aser sub-divisions

nunga MHA nungi totuyuba agüja aliba ama kasa yimya nung National Song (Vande Mataram) aser National Anthem ya atentsü.

National Anthem mapang ama National Song (Vande Mataram) atandang sentong nung adener lokti nokdaka atatsü.

Home Department, Government of Nagaland ajanga State yimtiba aser districts aser sub-divisions nung Independence Day anogomung nung shilem agitsü nübur ajunga pelashishia jaokogo.

Kohima nung agiba sentong ya State IPR Department indang official YouTube channel 'DIPR Nagaland' nung Live sayutsü.

Advisor Achumbemo-i senden ayonger

Dimapur, Luroi/August 13 Change (2026- 2027) indang Chongshen Committee Room nung nikongtsütsü 1 ako nungi tenzüka agitsü. Committee züngsem ajak iba senden nung arua shilem agitsü asoshi Advisor-isa mepeshia metetdaksüogo.

(TYO): Advisor aser 1buba Comprehensive Committee on Environment Report adopt asütsü atema August 18 nü senden ka mendenbuba Achumbemo ayongzükogo. Kikon-i, Committee on Iba senden ya Assembly Secretariat kübok C.

GOVERNMENT OF NAGALAND
DIRECTORATE OF TECHNICAL EDUCATION
NAGALAND : KOHIMA 797004

NO.DTE/CSAB.NEUT/1/2023/622

Dated, Kohima the 13th Aug.2026.

NOTIFICATION

This is to inform all the JEE (Main) CSAB-NEUT 2026 appeared candidates that the Spot and final round counselling for CSAB-NEUT:2026 is scheduled on 20th August 2026, at the Directorate of Technical Education, below Nagaland Secretariat, Kohima, against the program indicated below. Interested candidates with valid JEE (Main) 2026 score are informed to submit application form to the office of the undersigned on or before 12:00 noon, the 20th August 2026, Counselling will commence by 1:00PM. (documents includes: ST, Indigenous Certificate, PRC, Dob Certificate, HSSLC mark sheet, JEE admit card, JEE score card, 3nos of recent passport photographs, BT Certificate and one ID proof (either. Pan Card/Aadhaar Card).

Candidates who have withdrawn their allotted seat in round 1 & 2 and who did not register for CSAB-NEUT 2026 are also eligible to participate. The candidate has to pay the seat allotment/ acceptance fees of Rs. 5000/- in cash (Rupees Five Thousand only) in the event he/she is selected in the Spot Round Counselling.

SL. NO	STREAM	PROGRAM
1	BE/B.Tech	Civil Engineering
2	BE/B.Tech	Chemical Engineering/ Technology
3	BE/B.Tech	Computer Science & Engineering
4	BE/B.Tech	Electrical Engineering
5	BE/B.Tech	Electrical & Electronics Engineering
6	BE/B.Tech	Electronics & Telecommunication Engineering
7	BE/B.Tech	Electronics & Communication Engineering
8	BE/B.Tech	Mechanical Engineering

Sd/-
(Er. VIPULHOU LHOUGU)
Director.

CP Dimapur-i I Day nü tesem asem nung drone mamshitsü tuyu

Dimapur, Luroi/August 13 Nisung shingia tenokdangba agütsür aliba tesem nung jelia ketdangsürtem dang nungi temelaba magi-i drone mesüra Remotely Piloted Aircraft (RPA) amshitsü memelatsü, ta kasa sangdong ajanga metetdaksü.

(TYO): Dimapur Commissioner of Police-i, August 15 nü Independence Day amungba mapang tongtibang tesem asem temeket km2 telongtet ya khen atema "Red Zones" mesüra "No Fly Zones" ta sangdongogo.

Commissioner of Police, Aotula T. Imchen, IPS-i tetuyuba agütsüba nung Drone Rules, 2021 Rule 24 dak ajemdaker iba tenokdangba ya agütsüogo, ta shia lir. Tenokdangba ya August 15 nü anepdang 2 ako nungi nikongtsütsü 6 ako tashi benoktsü.

Tenokdangba agütsür aliba tesemtem ya Dimapur DDSC Stadium, Chumoukedima Samaguting Stadium aser

Police department-i ashiba agi, security dak sendakba nung tetsükdaksü aliba ajanga iba tetuyuba ya agütsüogo, aser iba tetuyuba ya osangbenertem ajanga metetdaksütsü aser police office aser station tem nung mataka toktsütsü.

Ketdangsürtemi nüburtem, drone amshirtem aser ken o dak sendaka alirtem dang atakzükja aliba mapang tsüngda tetuyuba sülen tashi anga anidaktsü mepeshia metetdaksüogo.

NSSB-i CETSE atema Interview mapanglem sangdongogo

Dimapur, Luroi/August 13 Nagaland Staff Selection Board-i Combined Education and Technical Services Examination 2026 (CETSE 2026) atema Interview mapanglem tejangja sangdongogo, koba August 19 aser 20 nü agitsü.

Interview ya Nagaland Staff Selection Board, Kohima (Near NPSC Office) nung agitsü. Anepdang interview agitsüpur 9 ako nung tonga arutsüla aser tetoro süier agitsüpur 12:30 nung arutsüla.

Candidates temi interview agiba anogo parnok indang original kuli kakettem bener

arutsü nüngdaker. Interview mapang melenshitsü atema mepishiba Board-i magizütsü. 2025 küm March 19 nü sangdongba Advertisement NO. NSSB/EXAM-4/CTSE- 1/ 2025/464 Para 10 nung shia aliba ama candidate shirnok temsüa mali parnok disqualify sütsütsü.

Interview ya Group Interview asütsü. Annexure-I nung shia aliba ama candidate shirnoki Detailed Application Form (DAF) den District Medical Board-i agütsüba Medical Fitness Certificate magütsütetlir parnok Interview nung shilem agitsü memelatsü.

Mokokchung nung 'Har Ghar Tiranga' bike rally agiogo



Dimapur, Luroi/August 13 Mokokchung district nung August 13 nü bike rally ka agia 'Har Ghar Tiranga Campaign 2026' officially tenzükogo.

Iba rally ya Mokokchung Deputy Commissioner, Ajit Kumar Verma, IAS-i Deputy Commissioner's Office Complex nungi tenzükja liasü. Iba sentong nung Senior Superintendent of Police, Vesupra Kezo-a shilem agia liasü.

Sentong nung o jembiba mapang DC Ajit Kumar Verma-i, iba rally ya koda tongtibang iba indang lemsatep. Paisa, India telongjem aser arok tashi sayutsü atema linük ajunga nung sentong ayongzuka agiba nung iba ya-a shilem ka lir, ta ashi.

"Linük wako ya akhümsübu aser asen meraket temaitsü ka lir," ta DC-i ashi.

DC-i lisopurtem dang India sorkari India wako indang Code salatsüogo aser iba ajanga ajak nem pei kidang aser mapa inyakba tesem nung linük wako asongtsü atema temelaba agütsüogo, ta ashi. Paisa, rally nung shilem agir ajak dang kanga pelaba lemsatep. Maneni DC-i, lokti dang iba anogomung ya linük telongjem aser kin o kin tsüngda tensesdaktep akangshitsü asoshi bendanga agütsüshiba anogo ka südakjang ta ashi.

Iba sülen bike rally ya DC indang office complex nungi tenzükja liasü. DC aser Sr. SP nati anir linük wako songer aliba motorcycle tem ya jila teyong ajanga süia liasü.

Rally ya DC Office Complex nung tenzükba sülen- BOC Area - Public Ground longa senzür Main Police Point nung tembanga liasü.



START YOUR
CAREER WITH
UNIQLO

TOP JAPANESE RETAIL FASHION BRAND

- Globally No. 3 in sales
- Global-standard work culture
- A future of limitless possibilities

INVITING ALL COLLEGE STUDENTS, GRADUATES & POSTGRADUATES FROM NAGALAND

21
AUG
2026

UNIQLO
XPERIENCE
DAY

10:00 AM
ZONE NIATHU
BY THE PARK
CHUMOUKEDIMA

DISCOVER
UNIQLO BRAND
& PRODUCTS

LEARN
FROM THE COO
OF UNIQLO INDIA

EXPLORE
CAREER
OPPORTUNITIES

OFFERING

* 3
MONTH
TRAINEE RETAIL
ASSOCIATE
• CONTRACTUAL ROLE •

₹ 25,000 CTC/MONTHLY

- DELHI NCR
- FLIGHT FARE SUPPORT
- ACCOMMODATION SUPPORT



REGISTER NOW! SCAN THE
QR CODE. LIMITED SEATS!

REGISTRATION ON 21ST AUG
9:30 AM - 10:00 AM

PARTICIPATE & WIN
UNIQLO MERCHANDISE

BE PART OF A GLOBAL BRAND

IN COLLABORATION WITH




RedFort amakba nung AQIS-i shilem agia lir: United Nations

New Delhi, Luroi/ August 13 (Agencies): United Nations Analytical Support & Sanctions Monitoring Team indang 38buba report ajanga, 2025 kum November ita nung New Delhi nung Red Fort anasa bomb amshia amakba nung Al-Qaida in the Indian Subcontinent (AQIS) teloki shilem agia lir, ta metetdaksü.

Islamic State, Al-Qaida aser item ama kiralongrar teloktem mita reprangba Security Council committee nem iba report ya agütsü.

"AQIS ya regional kiralongrar telok ka kumdar. 2025 kum



November ita nung Delhi nung Red Fort amakba ya AQIS-i lir," ta report nungji shia lir. India aser temeket nung aliba

region nung AQIS telok ya kanga yakyaka kumdar, ta parnokisa metetdaksü.

Taliban teloki maneni kiralongrar teloktem jenokdaksür, aser tang rara aliba ya ajanga kiralongrar teloktemi maongka kanga angur aser iba ya ajanga region tesem ajaklen security tsütsü tayongzükba tali ajurutsü, ta parnokisa metetdaksü.

Security Council indang Monitoring Team-i ita trok shia report agütsür, aser ibaji kiralongra amokmeren asadangba aser nokdangba nung züngsem linüktem yarisemtsü atema lir.

Tzüngluruwa mongpu Parliament tembangogo; bill 12 agizük

New Delhi, August 13 (Agencies): Brihostibarnü tzüngluruwa mongpu Parliament senden tembangogo; Lok Sabha Speaker Om Birla aser Rajya Sabha Chairman CP Radhakrishnan nati House anaprongla nung senden tembangtsüogo.

Tan mongpu senden nung Opposition züngsemtemi NEET paper leak asüba, police-i tashiyim amshiba aser Ayodhya nung Ram tekülem ki tenla auyaba onüktem nung ajemdaker longkak aita takhangba balala agütsüba ajanga senden junga magiteti tembangogo.

Tan mongpu Lok Sabha senden tatembangbuba nung Vande Mataram ken atem. Iba ken tekong trokprongla atemba mapang nung Ato kilonser Narendra Modi aser Congress lenir Rahul Gandhi na densema MP tem aika liasü.

Rajya Sabha nunga tatembangbuba anogo nung voice vote ajanga Mines and Minerals (Development and Regulation) Amendment Bill agizük. Rajya Sabha nung Zero Hour aser Question Hour naprongla thinena liasü.

Tan mongpu senden July 20 nü tenzükba anogo nungi Opposition MP temi exam paper leak asüba aser exam nung ochimashi atema o lemteptsü akhangba den külemi sorkar dang nungi telangzüba meshia liasü.

Opposition-isa July 20 nü Jantar Mantar nung kaketshirtemi longkak aitba mapang nung police-i tashiyim

amshiba atema sorkar aija Home Minister Amit Shah-i telangzüba agütsütsüla, ta takhangba agüja aru.

Union Parliamentary Affairs Minister Kiren Rijiju-i, senden takok ngua tembangogo, ajisüaka o lemtep junga magiteti liasü, ta metetdaksü.

"Business sasep nungbo iba senden kanga takok nguogo; ajak senteper bill 12 agizük. Ajisüaka o entepba mesüra o lemtepba sasep nungbo senden takok mangu," ta pai ashi.

Rijiju-isa, senden takok ngua magitetbaji opposition züngsemtemi senden nung timtem agütsüba ajanga lir, ajisüaka sorkaribo tasüngdangba ajak atema telangzüba agütsütsü renema dang liasü, ta metetdaksü.

"Iba ya parliamentary democracy atema majung," ta pai ashi.

"Lok Sabha nung bill 11 bo o melemtepi agizük; bill ka dang o lemtepa agizük," ta paisa shisem.

Tan mongpu nung sorkari Foreign Contribution (Regulation) Act (FCRA) Amendment Bill benoka agizüktsü tebilemba liasü, saka iba bill anema opposition aser lokti tentet balalai iba bill anema ola adokba nung ajemdaker iba bill ya jungjunga asadangtsü atema Joint Parliamentary Committee (JPC) ka nem agütsüogo.

Bodhbarnü Lok Sabha senden nung Union Minister Nityanand Rai-i iba bill ya JPC ka nem agütsütsü atema bangzüng ka benok aser kasa anogo nungjisa bangzüngji agizük.

JPC-i iba bill ya jungjunga asadanga report renemba sülen taküm asüakwa mongpu Parliament senden mezüngbuba hopta nung iba report ji nung agütsütsü.

	CIRCULAR ROAD BRANCH Ground Floor, Faith Building, Near Khermahal Traffic Point, Dimapur, Nagaland- 797112, Email: vjdima@bankofbaroda.bank.in	NOTICE TO BORROWER (UNDER SUB-SECTION (2) OF SECTION 13 OF THE SARFAESI ACT, 2002)
To, MRS. WURHOTSHU NYUTHE (Proprietor) M/s. Naga Poultry Farm, House No. 25, Thahekhu Village, Dimapur, Nagaland- 797112. Dear Sir/Madam,		Place: Dimapur Date: 6th August 2026
Re: Credit facilities with our Circular Road Branch (VJDIMA)		
1. Onoki 16-06-2025 anogo nung credit facilities agütsüba aser sanction telatetbatem metetdaksüba shidi lephsir. Tekalen shia aliba sanction nung ajemdaker nai security agüja credit facilities agir item senotsüji amshiogo. Tang tashi nung adokba loan/credit facility accounts aser security interests ji teküboklen yamai agütsür:		
Nature and type of facility	Limit (Rs.)	Rate of interest
Cash Credit	Rs. 25,00,000/- (Rupees Twenty Five Lakhs only)	9.20% p.a.
Term Loan	Rs. 2,07,00,000/- (Rupees Two Crores Seven Lakhs only)	9% p.a.
Total		Rs. 2,20,43,385.98
2. Nai sentsüh magütetetba nung ajemdaker nü indang loan account ji 'non-performing asset' ta 29-07-2026 anogo nung sangdongogo, aser ibaji Reserve Bank of India tetuyuba aser telatetbatem nung shia aliba ama lir. Onoki aiben mepishiogo saka nai sen tetemlok densema sentsüh magütsü.		
3. Securities balala ajanga tekalen para 1 nung shia aliba ama nai credit facilities agiba atema nai sentsüh magütsütet aser nü account ji non-performing asset ta sangdongogo, anungji onoki Securitisation and Reconstruction of Financial Assets and Enforcement of Security Interest Act, 2002 nung section 13 kübok sub-section (2) nung ajemdaker nü nem notice agüja nü dang iba notice agütsüba anogo nungi anogo 60 tsüngda tekalen para 1 nung shia aliba ama Bank nem tagütsütsü aliba sentsüh ajak Rs. 2,20,43,385.98 (Rupees Two Crore Twenty Lakhs Forty Three Thousand Three Hundred Eighty Five and Ninety Eight Paise only) den sen tetemlok aser charges agüjang ta tuyur. Onokisa nü nem iba notice agütsür, tekalen shia aliba sentsüh den payment anogo tashi nung sen tetemlok magütsüra onoki iba Act nung section 13 kübok sub-section (4) nung aliba temeden ajak amshitsü.		
4. Sentsüh ajak magütsüma tashi tekalen para 1 nung shia aliba rates nung sen tetemlok maneni alitsü.		
5. Onoki iba Act nung section 13 kübok sub-section 13 nung ajemdaker tezüluba nung onok dang nung temelaba memeshii para 1 nung aliba secured assets ji transfer asütsü, ayoktsü, lease asütsü mesüra tanga inyaksangshi asütsü nü dang memelar (ordinary course of business dak alaka). Shia aliba Act nung section 13 (13) nung aliba ama meinyakbaji iba Act nung section 29 kübok temerenshi angutsüsa ozüng alema inyakba lir.		
6. Maneni onoki iba Act nung section 13 kübok sub section (8) nung ajemdaker public auction/quotations/ tender/private treaty atema public notice agütsüba anogo matong tashi nung nai item secured assets alangzüksü akok, sentsüh den külemi costs, charges aser bank-i indokba senotsü ajakji nai tender asüba süra. Ashiba ama notice agütsüba sülenbo item secured assets alangzüksü atema nü dak temeden malitsü.		
7. Iba demand notice ya kuli ama mamshitsü aser temeden kar agienba ama mezüngshitsü, iba nungji limitation mali, aser ibaji onok nem tagütsütsü aliba sentsüh atema maneni temeden lia inyaksü atema lir.		
Yours faithfully, Authorised Officer		

	CIRCULAR ROAD BRANCH Ground Floor, Faith Building, Near Khermahal Traffic Point, Dimapur, Nagaland- 797112, Email: vjdima@bankofbaroda.bank.in	NOTICE TO GUARANTOR (UNDER SUB-SECTION (2) OF SECTION 13 OF THE SARFAESI ACT, 2002)
To, Aola Nyuthe Meluri Village, Phek, Nagaland- 797114. Madam / Dear Sir,		Place: Dimapur Date: 6th August 2026
Re: M/S. NAGA POULTRY FARM (Prop.: MRS. WURHOTSHU NYUTHE) nem sen aputsüba atema nai guarantee asüba		
17-06-2025 anogo nung guarantee asüba ama M/S. NAGA POULTRY FARM (Prop.: MRS. WURHOTSHU NYUTHE) nem Rs. 2,32,00,000/- (Rupees Two Crores Thirty Two Lakhs only) agütsüogo, aser guarantee document nung aliba ama sen tetemloka lir. Guarantee ka ama nai onok nem item securities agütsü:		
17-06-2025 anogo nung Ms. Aola Nyuthe indang Personal guarantee deed		
Sen apuri sentsühji magütetet aser pa indang account ji non-performing asset ta züngshiogo, ta onoki nü nem metetdaksütsüsa akümer. Securitization and Reconstruction of Financial Assets and Enforcement of Security Interest Act, 2002 nung section 13(2) nung ajemdaker August 6, 2026 anogo nung onoki sen apur nem agütsüba notice copy ka yangi agütsür. Sen apuri sentsühji magütsütet, anungji guarantee nung aliba telatetbatem nung ajemdaker nai onok nem loan/credit facilities Rs. 2,20,43,385.98 (Rupees Two Crore Twenty Lakhs Forty Three Thousand Three Hundred Eighty Five Rupees and Ninety Eight Paise only) ji agütsütsüla, iba denji külemi sen tetemlok aser tanga charges agütsütsüla, aser onoki guarantee nung ajemdaker nü dang iba notice agütsüba anogo nungi tenzüka anogo 60 tsüngda senji agüjang ta tuyur. August 6, 2026 anogo nung sen apur nem agütsüba notice nung para 1 nung aliba rates nung ajemdaker sen tetemlokko maneni alitsü (copy densema lir).		
1. Sentsüh aotsü atema guarantee telatetbatem nung nai agütsüba security nung ajemdaker anogo 60 indang notice ya Securitization and Reconstruction of Financial Assets and Enforcement of Security Interest Act, 2002 nung section 13 kübok sub-section (2) kübok notice ka ama züngshitsüla. Onokisa nü nem ya metetdaksür, tekalen shia aliba sen den külemi tetemloki payment anogo tashi nung magütsütetra onoki iba Act nung section 13 kübok sub-section (4) nung aliba temeden ajak amshia inyaksangshitsü.		
2. Onoki iba Act nung section 13 kübok sub-section 13 nung ajemdaker tezüluba nung onok dang nungi temelaba memeshii para 1 nung aliba secured assets ji transfer asütsü, ayoktsü, lease asütsü mesüra tanga inyaksangshi asütsü nü dang memelar (ordinary course of business dak alaka). Shia aliba Act nung section 13 (13) nung aliba ama meinyakbaji iba Act nung section 29 kübok temerenshi angutsüsa ozüng alema inyakba lir.		
3. Maneni onoki iba Act nung section 13 kübok sub section (8) nung ajemdaker public auction/quotations/ tender/private treaty atema public notice agütsüba anogo matong tashi nung nai item secured assets alangzüksü akok, sentsüh den külemi costs, charges aser bank-i indokba senotsü ajakji nai tender asüba süra. Ashiba ama notice agütsüba sülenbo item secured assets alangzüksü atema nü dak temeden malitsü.		
4. Iba demand notice ya kuli ama mamshitsü aser temeden kar agienba ama mezüngshitsü, iba nungji limitation mali, aser ibaji onok nem tagütsütsü aliba sentsüh atema maneni temeden lia inyaksü atema lir.		
Yours faithfully, Authorised Officer		

Form No. 3 [See Regulation-13 (1)(a)] DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)
Case No.: OA / 378/ 2026 Iba Act nung section 19 kübok sub-section (4) nung ajemdaker jaoker, Debt Recovery Tribunal (Procedure) Rules, 1993 nung rule 5 kübok sub-rule (2A) densema zügang Exh. No. 6452
BANK OF BARODA - VS - MR. K KATHI CHISHI
To, (1) MR. K KATHI CHISHI Son of Kovukho Kashiho Chishi, Resident of House No. 36, Kyong Colony, Wania Flats, Sewak, Dimapur, Nagaland- 797112, India. JAOKER 23-07-2026 anogo nung Presiding Officer/Registrar matsüngdang OA / 378 / 2026 benoka liasü Rs. 1,41,13,769.51 sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir). Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:- (i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür; (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla; (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar; (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla; (v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla. Nü dang tezüluba nung sangdong applicant nem agütsütsü tuyur aser 02-09-2026 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemtetba agitsü. Paper Book agüja aliba Url nung angutsü: https://cis.drt.gov.in/drtlive/paperbook.php?ri=2026474640620 25-07-2026 anogo nung tsünglanglen kü meyongnem den iba Tribunal indang seal agütsür:
Registrar I/C Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 14, 2026

Asenok India nunger masü !

Tanü ya asenok Naga kin yimten nüchiso anguba anogo lir. Aji oda, Naga lima dang masü saka India aser tang aliba Pakistan aser Bangladesh lima ajunga ya India ta ser British yimli kübok aliba nungi 1947 küm 15 August anogo nung Britsh yimteni nüchiso agütsütsü lia, Naga National Council-i Naga nunger yimten nüchiso nguogo ta kasa küm 14 August nung sangdong. Iba jagi, shitakba nungbo tanü tashi asenok Naga nunger kar India kübok aser kar Myanmar (Burma) kübok ta liaka, asenoki asenoksasa yimten nüchiso anogo sangdongba anogoji küm shia amunger. Anungji, taküm 2026 küm ya Naga nunger yimten nüchiso ngur küm 80 buba amunger asütsü. Atangji, aji tamongla amunger, kechiyong Naga yimten nüchiso bushir Naga National Council telok nungi tulubai anir tilatiba tashi tebang agi ashitsü makokba timtem, reshikangshi aser takoksa ajuruogo. Aji oda, tanü assenokbo India temzüng kübok jangratema lia alitsüa akok saka kodaser asenoki 1947 küm Naga yimten nüchiso anogo sangdongertem aser parnok mapa amadoktsü. India nungertema British yimten talenba nungi mesalatsüyonga 1930 küm January 26 nü Lahore nung Congress teloki parnoksasa Purna Swaraj ,Shitakba Nüchiso nguogo ta sangdongba sülenang, ano shitakba yimten nüchisobo küm 17 buba nungang 1947 küm angu. Ibaji mesüka Naga nungertema tangar alima kintemi hau ta agizüka züngoktsüsa yimten nüchiso menguaka, 1947 küm 14 August nung asenoksasa alima dang onoka shinga yimten kübok melii onoka onok meten yimten balaka lateter alitsü lemtetogo ta sangdongba mapaji amata masü. Ibaji asayamenüba mapa ka masü aser tanü India temzüng kübok asenok sen aika agia jangratema alitsüa akok saka iba jagia 14th August Naga Independence anogo yabo mezüngmeshitsü makok. Tanü asenok India-i agiba election nung shilem agir aser election nung adokertema India temzüng akanga bentshitsu aser India telungjem meraksai takangba alitsü asoshi bendanga agütsür inyaksü Tsüngrem tenüng nung tenangzükba agir aser iba sülen nümadangdanga Indian flag songer senzür. Ajisüaka, asenoki NNC purtemi taküm bendanga agüja Naga yimten nüchiso asoshi inyakba mapatem amajok mekümdaktsüi Naga yimten temeten indang jembipet jembitsüla aser 14th August 1947 anogo ya kodanga mamatsüla. Ashiko, Tsüngremi dang mulungra, India nungertema parnoksaa nüchiso sangdonger küm 17 buba nung shitakba nüchiso angu ama, asenoka asenok mapang ka nung Tsüngremi asenok nem yimten nüchiso agütsütsü. Tanübo asenok Naga nungertem kodanga yimten nüchiso mangutsü ama telok balala zünger mezüngma lemsar lir, saka asenoka kenübo lungjemtsü aser kenübo shitakba yimten nüchiso jenjang angutsü. Iba anogoji matong tashi asenok teinyaktsüji asenok Naga nunger India nung alisangia aser Myanmar nung alisangia ‘ ni Naga nunger’ ta asüba azü nungi aruba tesentaktep aser ayakji mamai alitsüla. Iba ayak mamatsübaji asenoki teti Naga yimten temeten otsü aser 14th August, 1947 nung Naga yimten nüchiso sangdongba anogo indang mamai jembitsüla. Tanü asenok India kübok jangratema aliba agi asenoki Naga nunger yimten temeten aser nüchiso asoshi raraba, taküm agütsüba aser reshikangshi ajuruba anogotem amadokra, atangji, asenokji suwar asütsü. NNC lenirtemi ashiba ama, asenok India nunger masü aser Burma nungertema masü saka tanü kangshia India nunger kümdaktsüba dang lir. Iba jagi tanüa India len tesem aika nung India nungertemi asenok ya India nunger masüa ta ashitsü aser aji shitak lir. Tanübo India nunger tsüngdang asenoksasa asenok kangshia India nunger-a ta angatetdaktsütsü meranger, saka parnokki mamanger. Iba tiaji tanü ama “Naga Purna Swaraj” anogo nung bilemdangtsüla.

OLEMSABANG

TIAZÜ KI ASER TZÜMETSÜNG ASADANGBA

~ P.Renthy Jamir

Iba ocet ya Naga nunger takotet walunir Wb.Meyionen Jamir-i 17th June, 2026 Tir Yimyim nung “KHRISTAR AROGO YANGLULOKBA NUNG TAMANGERTEMI BILEMDANGTSÜ ONÜK KAR” ta sür zuluba nung O semlok tatsüka zülur.

Mezüngbuba nung pai züluba oren ishika tama lephsia zülur “ Census operation arudar, yimden aser Arogo lungjemer langka inyaksü tang mapang tapet ta bilemer. Ao Senden aser ABAM na khien ajurutepa shisadang nunga junger to ta bilemer. Tiazü nütsüng yongsük taila zülüoka ki tasen süloker tasür tema masü kümer yimdak malir bendanglen alir ajak yimdak ali amai zülur populationji teimba asütsü, Electoral Rolljia teimba asütsü RD household aser job Cardjia teimba asütsü ta sür alima temoatsü agiyonga aotsü asü, oda ojang dang tiazü seret tiazü figure bener Tsüngrem dang temoatsü temoatsü dang meshia melili, alima temoatsü dang nungibo Tsüngremer temoatsü tuluba aser ochi mashiba alima rongsen nungbo teti atakatem lir ta angateta kodang asen Aori telemtetba tajung Tsüngrem tsüngdang azüngashia agitettsü?

Iba ya Aor dang masü tangar kin Ao oshi züngteter ajaki züngogo. Saka shingaia ola kata madok kechiyong July ita nung House listing operation arutsü Naga nunger kin ajak tiazü nisung maliba taila ki sütepba tialong mapang ka liasü. Naga lima yimtsüng aser jilatem ajak nung tiazü ki tilala asür yim ama sütena ayu. Tsüngrem tsüngdang magimatsü temenen atakatem mapa inyaksü Naga kin tamanger ajak tejangraba tulu liasü. Iba ya tai temenen tulu ta ajaki meteter saka ola madok. Pai Ao Senden aser ABAM na khien ajurutepa shisadangtsü ashi. Saka ajia tzürongrong nung ken tentok dang asü. Tiazü jembitsü Anania o tebuttsü Safira na shisa ajemba ama ABAM, NBCC mesüra Naga nunger tamanger Mungdang balala lokti tentet aser Hoho balala kin shingaia yabo tai ulura, linük dangi Tsüngrem terasaba atakatem tulu arutsü ta meshisadang lipok dang nungi lokti-i menaba temenen atakatem temerenshibo lokti dangisa arur. Anungji Yisu kangki nung tepsetdang Yihuda nungertemi Pa zü onok madak aser onok chirtem madak toang ta meshizükba Isreal nübur dangi timtem tekangshi aruba maremtet nung 1974 nung par tetsü-tebuo-i meshizükba atakatem o ya tatok nangzüka ya Yihuda nunger ajak atema (Jew’s collective responsible) masütsü ta Tsüngrem aser alima tsüngdang tai nangzüka tatok meshi. Kechiyong nisungi Tsüngrem temerenshi tizüktsü makok. 2026 July ita Naga nunger lokti tayimtenba olaji ozü ki kibong ka dang alir nung kibong pezü alir ta zülüoktsübo Tsüngrem dang magimatsüato ta ashi nung “ **TAIJI YIMTENI ABENTSÜAJAK LOKTI KHURET ASUTSU**”. Naga lima Khrista asoshi to ya no! Revival to kongi ao?, Jubilee to kong lir? Iba tang tai tulubabo Sodom Gomora nungjia meinyaki alitsü. Nisung maliba tiazü taila ki asütsü ya mezüngbuba Naga nunger shiba kolok nungi tama shisatet ta süngmangseta bilemer. Ainkar Mika-ia mapang tanela kati “ Ni aotsü aser ainkar ajak bang agi tiazü jembidaktsütsü” ta ashiba ama Naga nunger tamanger ajak atakatem mapa tulu inyaksü nung shisa molung ajemtsü Satani mapa inyak.

Iba atakatem mapa ya aija ABAM-i bo ola kabo adoktsü ta sa bilem, masüyonga NBCC –ibo ya tim masü, asen Naga nungeri magimatsü ta nongtemtsü ta imlaseta ata kecha ola mali. Manger mesangwa tang Naga lima nung ki tasen tilala tilala zünger mezüngma sütepba ayu. Kentener telok bilemteter, 1991 küm 59 buba ACYE Convention, Changtongya Town nung sentepdang kentener telok balalai ken 132 aten. Ao oshi agi 128 aser English agi 4. Item rongnung telok kati “ Tsüngremi Naga lima meimba yong menoknok sota lir, tzümettsüng nungi ajungketa yutsü”.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bihar nung Khristan tem yimtsü nungi meindoktsü amokmeren



August 08, 2026 nü Bhagalpur district kübok Gopalpur yimdak Hindu yimsü alia amangertemi autorickshaw ka nung 'sound system' inoker Khristan tem amokmerena senzüdang tangokba noksa nung angur.

August 13, 2026: Bihar nung Hindu yimsü alia amangertemi yimjak nung Khristan tem amokmerena Hindu yimsü dangi meyipang mesüra yimtsü nung toktsür oang, ta metetdaksü.

August 08, 2026 nü Bhagalpur district kübok Gopalpur yimdak Hindu yimsü alia amangertemi autorickshaw ka nung 'sound system' inoker Khristan tem dang Hindu yimsü dangi meyipang mesüra yimdak nungi aridoktsü, ta sangokja senzü.

Iba yimtsü nung Khristan kibong 42 dangji 'samaj drohis' (loktiliba ashioktürtem) ta ajar. Gopalpur ya Sabour block kübok lir. Iba yimdak kibong 411 aser nütsü nung 2,387 lir (2011 census).

Hindu yimsü alia amangertem jagi, yimdak Khristan tem aser Tenla kitem aliba ajanga amokmeren kanga ajurur, ta shia yimdak litem dang Khristan tem den tesendaktep kecha mayutsü mepishia liasü.

Parnokisa, "Tanü yimdak Tenla kitem melara asüngbo mosques-a melatsü, aser ibaji ajanga yimtsü nung raksatsütsü," ta metetdaksü.

Hindu nungertem jagi, akhidangbo iba yimdak Hindu nungertem temeja liasü, anungji iba yimdak Hindu nungertem dang alitsüla, ta ashi.

Yimdaklir kari ashiba agi, yimdak tesem ajaklen Khristan tem amokmerena jajabaji ajanga Khristan kibongtem tetsübu nung lir.

Osangbener den jembidang yimdaklir Khristan kati, "Mapang talangka nungi onoki item ama amokmeren ajangshia arudar. Ajisüaka tang mezü nung yimjak nung sangdong agüja onok amokmerener. Anungji onoki Khristan yimsü metoktsüra onok nem temerenshi agütsütsü akok," ta metetdaksü.

"Ajisüaka onoki Kibuba dak teimla akar," ta paisa metetdaksü.

Jesuit putir aser meimchir temeden atema inyaker Cedric Prakash-i, iba ya Khristan tem sendoktsü atema tayongzükb agütsüba lir, ta ashi.

"Nisungtem dang Khristan yimsü tokjang mesüra ki toktsür oadokang ta metetdaksüba ya tebilemtsü onük tuluka lir, Iba ya yimsü temeden aser linük temzü nung kübok temeden balala anema lir," ta Cedric Prakash-i metetdaksü.

Gujarat nung alir Prakash-isa, iba tatalokba kija ya masü saka linük tesem ajaklen Khristan tem reshikangshir, ta metetdaksü.

India Hate Lab report ajanga ashiba agi, 2025 küm India nung nütsü nung ajema alirtem anema tesempa o

jembiba tatalokba 1,318 liasü, aser ibaji 2023 küm den medemdangra shilem 97 agi teimba akümba lir.

Minorities anema tesempa o jembibaji shilem 88 bo BJP sorkar aliba mesüra yimtenren nung BJP den teloktep sorkar aliba state tem nung lir.

Nütsü nung million 130 aliba Bihar state nung nütsü nung shilem 0.12 dang Khristan tem lir.

Osangbener den jembidang Persecution Relief tentetsang, Shibu Thomas-i, "Khristan tem sendoktsü atema yimjak nung tayongzükb agütsüba ajanga yimsü nung ajemdaker ano telemsa tuluba adoktsü. Iba ya linük temzü nung ajanga agütsüba yimsü temeden anema lir," ta metetdaksü.

ANO GO ABEN TSÜNGREM DEN

Tebui tajungtibaji metet

"Kibubai temeshibatem tatidang nungi koda kümzüksü, aser memeshiba tem koda o bendangba anogo asoshi ayutsü Pai metet."

2 Peter 2:9,10

Kodang tanuri tebilemtsü ajurudir asenoki yakta yaria iba tebilemtsü bentettsür. Saka asen kotaker Tebui yamaji meinyaker. Ken ken asenoki Tsüngrem dang Pa teyari yakta yoktsü mepishir, saka Tsüngremi tiaji asenoki koma agizüker mita dang alir. Peteri iba shiti ya timtem nung alirtem dangi zülü. Parnok rishikangshi nung liasü. Aika ki aser rongsen samadok aser parnok lima nungi aridok. Parnok Turkey lima nung jenoka ali. Iba mapang nung Peteri Tanela Temeshi-i ajungshia ya zülü.

Kibubai parnok timtem nung jagi kümzü k asü masü, parnoki timtemji aremzü k. Pai asenok tatidangba ajanga kümzüker, majurutsüba masü. Kibubaji ochi o bendanger aser Pai tamajung pur merenshitsü asoshi Tsüngremi rizü nung akaba nung merenshi. Saka parnoki aibelenba putetli dang Pa memerenshi. Kibuba taremzü k agi talangka atar. Item tamangertem kechi agi tasü itdaktsü süra Kibubai ajak azüoker ta parnoki meteta aliba agi parnok tasü itdaktsü. Kibubai anebaluba atena ora kecha maka. Pai tesülen nungi Pa sentsüwangshi aser asenok ajungtsü asoshi inyaker. Aikati taremzü k meli-i Kibuba dang yakta kümzü kang ta ozü nung agütsür. Kümzü ktsü melen Pa taochi den sütepa aintsü asoshi tatidangba nung wazüka ayur. Kibubai koda kümzü ktsü meteta lir. Kobika sarasademdir sarasademang, Kibubai asenok asoshi tajungtibaji meteta lir.

FCR Amendment bill JPC nem agütsüba Khristan temi pelaa agizüker



August 13, 2026: India sorkari foreign funding amendment bill jungjunga asadangtsü atema Joint Parliamentary Committee (JPC) ka nem agütsüba atema Khristan lenirtemi pelaba lemsatepogo.

Foreign Contribution (Regulation) Amendment Bill, 2026 ya tzü nungluwa mongpu senden nung benoktsü liasü, saka iba bill anema ola adoker aika aliba ajanga August 12 nü Minister of State for Home, Nityanand Rai-i iba Bill ya JPC ka nem agütsütsü atema bangzü nung ka benoka liasü. Ajioda kasa anogo nungsa Lok Sabha nung iba bangzü nung agizük.

Opposition-ibo iba Bill ya

agienadoktsüla, kechiyong ibaji ajanga temeim mapa inyakba melungtet teloktem, talisa Arogo aser yimsü dak sendakba organizations mejungi kongshitsü, ta ashir.

Iba bill asadangtsü atema tentetba JPC nungji zü nungsem 31 alitsü; Lok Sabha nungi zü nungsem 21 aser Rajya Sabha nungi zü nungsem 10 alitsü.

Taküm asü kwa mongpu Parliament tenzü kba mezü ngbuba hopta nungsa JPC-i Parliament nungi report ji agütsütsü.

Iba bill JPC nem agütsüba dak sendakba nung Catholic Bishops' Conference of India (CBCI)-i, "Iba ya democratic mera ka lir," ta metetdaksü.

August 12 nü CBCI-i, iba dak sendakba nung CBCI-i Ministry of Home Affairs aser Joint Parliamentary Committee den amaliteptsü aser shisa lemsateptsü, ta metetdaksü.

"Mapang talangka nungi India nung shisaliok, healthcare, loktiliba terenlok aser temeim mapa balala inyakba nung atema CBCI-i maneni inyaktsü," ta parnoki sangdong ka ajanga metetdaksü.

Iba bill JPC nem agütsüba atema All India Christian Council-ia pelaba lemsatep.

All India Christian Council-i sangdong ka ajanga, "Onok tangatetba, Opposition tangatetba aser lokti tentettem tangatetbaji, iba bill ya agienadoktsüla. Onoki tebilemba tajung nung onok tangatetbatem shidi ajanga committee den lemsateptsü aser tsü ngdong ajurua jembitsü," ta metetdaksü.

Parnokisa JPC dang iba bill dak sendakba nung nüburtem, rejutem aser state sorkartem dang parnok tebilemba onüktem asü ngdangtsüla, ta mepishia

metetdaksü. National Council of Churches in India (NCCI)-ia, JPC-i iba report renemba mapang nung NCCI-ia parnok ajurutsü, ta metetdaksü.

Khristan zü nungsem million 19 densema aliba NCCI nung General Secretary, Rev. Asir Ebenezer-i, "Lokti tentettemi nungitba aser ajungshiba atema pelar. Iba denji külemi Khristan tem aser Arogoi ketdangtsüba rejutemi nüburtem tenzü kba mapa inyakba atema pelar," ta metetdaksü.

Taküm March ita nung mezü ng iba Bill benokba sülen Catholic putirtem densema Khristan lenirtem aikati Centre sorkar dang iba bill ya agienadokang mesüra Parliament nung mebenokdang stakeholders ajak den tama jembiang, ta mepishia liasü.

August 6 nüa Khristan denomination balala nungi lenir 17-i Union Home Affairs Minister Amit Shah ajurua tebilemtsü onük lemsatepa liasü. Nütsü nung billion 1.4 aliba India nung nütsü nung shilem 2.3 dang Khristan tem lir.

AO OSHI ANGAZÜKDAK:**TANÜ ANGAZÜKTSÜBA OJANG****Züngok**

(v) Züngsem, dendaktsü (included)

* Nia tambur kentenertem rongnung züngok.

Züngpet

(v) shitak mazüing, aibelena azüing (miscount, count incorrectly)

* Sen amshirtemi tenla sen aruba züngpet.



Tir Yimyim

OLONG PAITEP # 7597

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüing tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüingdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7597 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. Teronem, 12. Sempa,
13. Jahaz.

Manipur: KCP-i Aug 15 nü state ajungamokdangayatsü auongzük

Imphal, Luroi/August 13 (Agencies): Tenokdangba agütsür aliba Kangleipak Communist Party (KCP)-Apunba teloki August 14 nü Manipur ajunga ghonda 24 mokdanga ayatsü ayongzükogo. India Independence Day amungba sentong nung shilem magitsü atema August 14 ayaterem nungi state ajunga mokdanga ayatsü parnok sentong lir.

Iba telok yagisa sangdong ka ajanga, medical emergency aser tamangba yimsü dak sendakba sentong tem menokdangtsü ta shiogo.

Iba telok yagi state ajunga mokdanga ayatsü ayongzükba ya Patriots' Day dak sendaka lir ta shiogo, koba Manipur nung August 13 nü 1891 küm Anglo-Manipur War nung British nung sepaitem anema raratem bilemtetsü atema amunger. Parnoki nüburtem dang rara nung asürtem leper

semdanga tetushi agütsütsü ayongzükogo, shirnoki rara mapang pei taküm bendanga agütsüogo.

K C P - A p u n b a - i s a , September 21, 1949 küm India nung maden tsüingda August 14, 1947 küm Manipur nüjiso nguatokogo, ta ashi. Centre sorkari nüburtem nemdema ayuba aser meimchir temden anema inyaksnmagshiba sülen Manipur ya India nung dena liasü, ta parnokisa ashi.

2023 küm May ita Manipur nung kin o kin tsüingda rara tenzükba indang jembiba mapang iba telok yagi ashiba agi, Centre-i "narco-terrorist" element tem amshia kin o kin tsüingda rarabangsen tali adokdaksütsü atema rongmesoa liasü.

Maneni iba telok yagi kin balala dang longjemer alitsü aser Manipur tarutsü aser sovereignty kümzüka ayatsü atema longjemer inyaksü ayongzük.

MOLUNGNEN O

Onoki teti meima aliba asür **Mrs. Ayimkumla Pongen** (Aliba) mapang tatsüka shiranga lir ajungbena iba alima nungi pila-a aodang kija, kibong, kiyonger, kinungertem aser tembartem shirnokisa sarasadem, rongsen, nübu aser shisatsü tajungtiba agi ozü den yaritepogo, nenok ajak dang kanga pelaba lemsateper.

Onoki nenok nisung shia dang pelaba meshitetaka Tsüngremi nenok ajak talubusa moajang ta ozü sarasadem.

~ **Temeim Chirnur & Kinungertem**



20.11.1981 ~ 08.08.2026

Mizoram: MZP-i longkak aitba anenogo

Aizwal, Luroi/August 13 (Agencies): Mizoram nung kaketshir lokti tentet Mizo Zirlai Pawl (MZP)-i, Mizoram Public Service Commission (MPSC) nung temelenshi bener arutsü khanga longkak aita aliba Bodhbarnü anenogo. Sorkari commission indang recruitment system asadangshitsü atema committee ka tentetsüba sülen parnoki iba jenjang agiogo, ta MZP lenir kati ashi.

MZP-i August 6 nü yimjung nung longkak aita iba longkak aitba sentong tenzük aser iba sülen Hombarnü MPSC office longbanga liasü. Office longbanga ayuba ajanga

ketdangsür aser staff tem telungi meiteti liasü.

Kaketshir lokti tentet yagi MPSC nung structure aser recruitment dak sendakba nung temelenshi bener arutsü takhangba agütsüogo, kong inyakyim tajungba küm daksütsü atema staff talila bendenloksüba densema lir. Reform committee ka tentetba aser One Time Registration (OTR) system agintsüba ajak takhangba nung densema lir.

MZP general secretary Lalhmingsanga Chhange-i ashiba agi, MZP-i mezüingbo maneni longkak aittsü sentong liasü, saka state sorkari reform panel ka tentetba sülen

Brehostibar nüa office longbanga ayatsü sentong aliba Bodhbar aonung thia liasü.

Mizoram sorkari, Secretary of the Department of Personnel and Administrative Reforms (DP&AR) tekolak ser züingsem tenet agi küm tetba committee ka tentetsüba sangdongogo.

Chief Minister Lalduhoma shibai DP&AR portfolio bena lir pai committee tentetsüogo, kong MPSC, Home, Law and Judicial, General Administration aser Finance departments nung ketdangsür tejentem densema lir aser DP&AR (General Service Wing) Joint Secretary member secretary asütsü.

Manipur nung Aug 13 nü Patriots' Day mungogo

Imphal, Luroi/August 13 (Agencies): 1891 küm Anglo-Manipuri War tembangba sülen British nungertemi tepsetter mesüra tanga tesemi anir aoertem nem tetushi agütsütsü atema Manipur nung August 13 nü Patriots' Day mungogo.

1891 küm August 13 nü Crown Prince Bir Tikendrajit aser General Thangal na Feida Pung nung aletseta südakja liasü. British chuba yimli anema raraba atema tena ya aija liasü.

Kasa anogo Niranjana Subedar, Pukhrambam Kajao aser Chirai Naga nungera Manipur jail nung tepset. Maharaj Kulachandra aser tangar 21 Kalapani-i yok, koba tanübo Andaman and Nicobar

Islands lir.

Iba anogo ya Manipur puti otsü nung kanga dang tongtibang anogo ka lir aser küm shia Patriots' Day ama amunger. Brehostibarnü state kübok tesem balala nung iba sentong ya ayongzüka mungogo.

District administration temia tetushi agütsüba sentong balala ayongzüka mungogo.

Chief Minister Yumnam Khemchand Singh-i anir Crown Prince Tikendrajit aser General Thangal na indang memorial site tem nung nara tokja tetushi agütsüogo.

Manipur Legislative Assembly Speaker, minister, MLA, Chief Secretary, Security Advisor, DGP aser

tanga sorkar ketdangsür tejentemi asürtem nem tetushi agüja liasü.

Facebook nung post ka ajanga Singh-i, pai Moirangkhom nung Hicham Yaicham Pat aser Thangal General Temple nung minister, MLA aser tanga ketdangsürtem matsüingdang nara tokja tetushi agütsüogo, ta ashi.

Chief Minister-isa, Manipur asoshi taküm bendanga agütsürtemi pei lima kümzüka ayatsü atema British chuba yimli anema nokdakba bilemteta jembia liasü.

Paisa, parnoki linük meimba aser tasü ita raraba ajanga tang tashi nüburtem ajungmesor ta ashiba den parnok maneni tushitsü ayongzüka liasü.

GOVERNMENT OF NAGALAND DIRECTORATE OF WOMEN RESOURCE DEVELOPMENT NAGALAND:: KOHIMA.			
NO.DWRD/DEV/MTC-4/2021		Dated Kohima, the August 2026	
ADVERTISEMENT			
The Department of Women Resource Development invites interested female applicants to undergo the 2 nd Batch of Training Programme under the following trades during 2026-2027.			
1. Baking & Confectionery : under Multi Training Centre (MTC) Kohima			
1	Course Duration	September - November (3 Months)	Intake Capacity
2	Eligibility Criteria	Class X Passed Age : 18-35 (as on 31 st August 2026)	10
2. Hairstyling : under Multi Training Centre (MTC) Kohima			
1	Course Duration	September - November (3 Months)	Intake Capacity
2	Eligibility Criteria	Class X Passed Age : 18-35 (as on 31 st August 2026)	10
NB: Last Date for Submission of Applications in Both Categories : 25 th August 2026			
1. Date of Interview		: 28 th August 2026	
2. Time		: 10:30 AM onwards	
3. Venue for Interview		: Multi Training Centre Bayavü: Kohima.	
4. Applications shall be received on first come first basis in the intake ratio of 1:3 in each course.			
Applications addressed to the Director, Women Resource Development in plain paper stating bio-data, 2 (two) recent passport size photos, self-attested copies of the relevant mark sheet, birth certificate, ST Certificate and any other relevant documents are to be submitted to the Officer-in-charge at the Multi Training Centre (MTC), Bayavü. Contact No. 7005658092.			
Sd/- (Vilone Sakhrie) Director			

Putin-i Japan asana mangatettep aliba asetkong semdang, Tokyo mepelar

Tokyo, Luroi/August 13 (Agencies): Russia Tir Vladimir Putin-i Japan anasa mangatettep aliba asetkong ka Brehostibarnü semdangba ajanga Tokyo-i kanga sashia aitsü, aser pai iba ama inyakba ya ajanga linük ana tsüngta tesendaktep tajungba akumtsü merangba tasak kumdaktsür ta ashi.

Russia nung iba asetkong dang Iturup ta ajar aser Japan nung Etorofu ta ajar, aser ibai World War II nung Japan bendanga agütsür anogo ishika lir Japan indang asetkong tongti tem anasa Moscow-i rakzükba Kuril chain nung pezü rongnung ka lir. Tokyo-i item ya par meyong ta ashir aser meyipa agütsütsü atema yimjung tezüngzüktep ka yanglutsüsa akumtsü.

Iba yagi Japan nüburtem temulung yirutsür aser khenyongi magizükteter, ta Ato Kilonser Sanae Takaichi-i television sangdong ka nung ashi. "Russia-i iba onük ya kanga süoki ia agütsü imlar," ta lai ashi.

Putin-i 2022 küm tashi ajak amshia Ukraine amaktsü totuyuba agütsüba sülen Moscow aser Tokyo tsüngta tesendaktep mejungi akum. Japan-i tanga linüktem den lungjemer Russia aitsü aser sanctions agüja liasü.

Japan-i World War II tembanga bendanga agütsür küm 81 ajungba bilemteta

munger anogo ana lir aser North Korea-i Japan den pilaba tziyim nung missile ka khaloktsür anogo ka lir Putin-i iba asetkong ya semdang. Seoul aser Washington lungjemer joint military exercises ka agütsü lir.

Iba mangatettep aliba tesem ya Russia lenir Dmitry Medvedev-i mezüng 2010 küm semdanga liasü.

Brehostibarnü Russian and Chinese ambassadors to Japan,

Nikolai Nozdrev aser Chinese Ambassador Wu Jianghao na külemi sangdong ka agütsüba nung World War II nung atalokba melenshitsü merangba anema nokdaktsü nangzük.

Parnoki ano Asia-Pacific nung re-militarisation masütsü tekumandangtsü ashi, koba Japan-i item asetkong nung kibur akumba Moscow-i magizükba den lirumedema lir.

(Maneni tapak 8 nung...)

Office of the Meyilong VDB Women KONANG TETUSHI AGÜTSÜR



Sd/-
Ngangshisola
President

Wb. Toshilemba aser Wt. Takolemla na jabaso **Dr. Imliyangba**, Doctor of Philosophy (Ph.d) in Statistics Department, Topic: "Studies on Family of Circular Generalized Lindley Distribution with Application" nung takok nguteta konang bener arutsüba asoshi Meyilong VDB-tsür ajanga tenüngsang aser tetushi tulu agütsür.

Ne mapa tajung aser meranga inyakba tejang tangtetogo ta Tsüngrem tenüng asanger. Tsüngremi maneni ne taküm tarutsü wadang nung len aniang ta VDB-tsür sarasadem.

Sd/-
Temsurenla
Secretary

TENÜNGSANG AGÜTSÜR

Dimapur Molungyimsen Sanglir Kidong-i tsünglanglen agüja aliba lennirtemi mapang balala nung pei pei wadang nung jenjang temaba tonga inyaktetba atema tenüngsang agütsür aser kidong asoshi konang bentsür aruba atema pelaba metetdaktsür.

1. Wb. Imnalensa Sanglir, IPS-i Nagaland Police nung IGP (Armed BN-NAP) menden atongba.
2. Wb. Temsutoshi Sanglir-i Department of Agriculture nung Joint Director menden atongba.
3. Wb. I. Anungba Sanglir-i Food and Civil Supplies Department nung Additional Director menden atongba.

Tsüngremi lennirtem taküm maneni len aniangma aser wadang moajangma.

**Kinungertem tenüng nung,
Sajung Sanglir, Dimapur**



PROGRAMME FOR CELEBRATION OF

80th INDEPENDENCE DAY

ON 15th AUGUST, 2026 AT NAGALAND CIVIL SECRETARIAT PLAZA, KOHIMA

0600 hrs : Hoisting of National Flag in all Government Offices, Institutions, Public & Private Buildings.

0850 hrs : Review of Parade by DGP, Nagaland.

- 0900 hrs** : 1. Arrival of Hon'ble Chief Minister
2. Singing of National Song
3. Hoisting of National Flag by Hon'ble Chief Minister
4. National Anthem
5. Inspection of Parade by Hon'ble Chief Minister
6. Address by Hon'ble Chief Minister
7. Singing of National Song
8. National Anthem
9. Presentation of Awards
10. March Past

PARADE CONTINGENTS:

- a. 13 Assam Rifles Bn.
- b. 78 Bn. CRPF
- c. 105 Bn. BSF
- d. DEF, Kohima
- e. Arunachal Pradesh Police (IR)
- f. 4th NAP Bn.
- g. 10th NAP (IR) Bn.
- h. 15th NAP (IR) Mahila Bn.
- i. Home Guards, Civil Defence & SDRF
- j. Ex-Servicemen
- k. 1st Nagaland NCC Bn.
- l. Nagaland Police Central Brass Band, PTS
- n. Nagaland Police Auxiliary Brass Band, 4th NAP Bn.
- o. 13 Assam Rifles Pipe Band
- p. 15th NAP (IR) Mahila Pipe Band

Parade Commander : Shri Akihito X. Chishi, NPS, Dy. Commandant, 1st NAP
Second-in-Command : Kmr. Alovika Swu, NPS, Asstt. Commandant, 12th NAP

LAUNCH / INAUGURATION / RELEASE / COMMISSIONING BY THE HON'BLE CHIEF MINISTER

1. Launch of Nagaland Integrated Information System (NIIS) and Virtual Inauguration of NISS Hub, DIPR, Kohima
2. Launch of 'Education Management Information System' under School Education Department
3. Virtual Inauguration of 10 MW Solar Power Plant, Hovukhu, Niuland under New & Renewable Energy Department
4. Release of 2 (two) Documented Books on Traditional Attires and Ornaments of the Indigenous Tribes of Nagaland – NHHDCCL
5. Virtual Commissioning of the Naga Model Integrated Settled Farming at Boke Botsa, Kohima District under Water Resources Department

Entertainment:

- a. Song : "Sümi Xülhe" by Living Voices, Dimapur (TaFMA)
- b. "Threads of Naga Heritage: Many Tribes, One Nagaland" by NSSA Cultural & Aesthetic Club

Cultural Presentation:

- | | |
|---|------------------|
| a. Mima Women Society Cultural Troupe | : (Angami Tribe) |
| b. Konyak She-Ong Cultural Society Kohima | : (KonyakTribe) |
| c. Tesophenyu Group Union | : (Rengma Tribe) |
| d. Bhumnyu Cultural Troupe Kohima | : (Phom Tribe) |
| e. Mangmetong Cultural Club Kohima | : (Ao Tribe) |
| f. Chang Dombü Edou | : (Chang Tribe) |
| h. Sumi Cultural Society, PCP Kohima | : (Sumi Tribe) |

VISIT OF INSTITUTIONS BY CHARITABLE ORGANIZATIONS (1200 hrs onward)

- | | |
|--|-------------------------------------|
| 1. Nagaland Contractors & Suppliers Union | : Jo Foundation |
| 2. Puliebadze Club | : Mt. Gilead Home |
| 3. Lions Club | : State Mental Health Institute |
| 4. Royal Club | : Bright Morning Star |
| 5. Classic Club | : Kohima Orphanage & Destitute Home |
| 6. Rotary Club | : Cradle Ridge |
| 7. Hindu Kalyan Samiti | : Old Age Home |
| 8. Indian Red Cross Society, Nagaland State Branch | : District Jail |
| 9. Kohima Chamber of Commerce & Industry | : Tabitha Enabling Academy |
| 10. Kohima Masjid Committee | : Cherry Blossom |
| 11. Nagaland Adventure Club | : Kevi Children Home |
| 12. Spikes Club | : Oncology Department at NHAH |
| 13. Gorkha Public Panchayat | : Leprosy Hospital, Nagabazar |

Distribution of Sweets at the Parade Ground by DRDA, Kohima.

EVENING PROGRAMME AT SECRETARIAT PLAZA

1500 hrs : Exhibition Football Match
Secretariat United FC vrs Vanguard FC (Old boys)

1600 hrs : Prize Distribution

- 1630 hrs** : Band Display
1. 13 Assam Rifles Pipe Band
 2. Nagaland Police Central Brass Band, PTS
 3. 15th NAP (IR) Mahila Pipe Band
 4. Nagaland Police Auxiliary Brass Band, 4th NAP Bn.

Beating of Retreat

1800 hrs : Governor's "At Home"- By invitation

MMTTA-i 2buba Nagaland Masters TT asayamung ayonger

Dimapur, Luroi/August 13 (TYO): Mokochung Masters Table Tennis Association-i sangdong ka ajanga 2buba Nagaland Masters Table Tennis Tournament 2026 September 9 nungi 11 tashi Multi-Purpose Hall, Mokochung nung asayatsü ta metetdaksüogo.

Iba asayamung ajanga Nagaland kübok tesem balala nungi veteran aser masters table tennis asayartem longjemdaksütsü, telongjem adokdaksütsü, kati ka den tokteptsü aser masters community nung table tennis asaya ajungkettsü nükjiong

nung iba asayamung ayongzükogo. Association-i, Nagaland kübok district ajak nungi Masters Table Tennis asayartem iba asayamung nung shilem agia 2buba Nagaland Masters Table Tennis Tournament takok südaksütsü asoshi pelashishia jaokogo.

Asayamung nung shilem agitsü jangrartem dang parnok tenüng züngoksema asayamung nung shilem agitsü ayongzükogo.

Maneni asayamung nung category balala, registration, entry fees, fixtures aser

asayamung dak sendakba tanga temzüng ozüng dak sendakba nung osang asayamung ayongzükba committee-i mapangtong nung metetdaksütsü, ta kasa sangdong ajanga metetdaksü.

Maneni Mokochung Masters Table Tennis Association-isa, Nagaland kübok tesem balala nung Masters asayartem Mokochung nung adenshia anogo asem toktepa asayatsü aser longjemtsü asoshi asayartem pelashishia agizüktsü yongya ataba metetdaksüogo.

Canadian Open: Swiatek aser Rybakina na final asayatsü



Luroi/August 13, 2026 (Agencies): Iga Swiatek aser Elena Rybakina nati pei tata semifinal asaya akokba sülen tena Canadian Open final asayatsü.

Grand Slam trok koker alila Swiatek-i semifinal nung Elina Svitolina 6-3 1-6 6-3 agi koka, taküm mezüngbuba WTA final ka tongtetogo.

Ita 12 tejakdang Cincinnati nung takok anguba sülen arishi

küm 25 tain Poland tsürla ya asayamung ka nung danga final tonga asayar mali, aser taküm semifinal ka dang tongteta lir.

"Taküm ni junga masayateti arudar aser kü taküm nung tasatiba küm ka asütsü," ta seventh seed Swiatek-i ashi.

"Iba hopta kanga junga asayatetogo aser iba ajanga ni ajungmesor, aser iba ajanga kechi atalokdir atalokaka maneni tejakdang aotsüla ta

sayur," ta laisa shisem.

Kasa asayamung tetsür kija asaya tanga semifinal ka nung Australian Open champion Rybakina-i Coco Gauff tsükdaksüogo.

Tanabuba set nung game pezü atonga akokba sülen world number two asayar yagi 5-7 6-2 6-2 agi takok ngutetogo. Lai quarter-final nung Naomi Osaka tsükdakja liasü.

"Mezüngbuba set kanga junga asayar ama bilem saka ni kanga aritepa asaya," ta arishi küm 27 Rybakina-i ashi. "Ni set asem nung asaya koktetba atema pelar," ta laisa shisem.

Hokolbarnü final asaya ya Swiatek aser Rybakina na tsüngda professional asaya 13buba asütsü. Tenapronglai asaya trokrok koka lir.

Montreal nung Canadian Open tebur kija asaya nung Ben Shelton aser America nunger asayar Brandon Nakashima na asayatsü. Semifinal nung Shelton-i Learner Tien aser Nakashima-i Rafael Jodar kokogo.

Nakashima tang mezüngbuba Masters 1,000 asayamung ka final nung asayatsü lir. Kasa mapang nung Shelton-i iba title tanaben abentsü merangtsü.

Atletico-i Romero atema £34m agütsütsü mulunga agizükogo

Luroi/August 13, 2026 (Agencies): Atletico Madrid-i Tottenham nungi Cristian Romero alizüktsü atema pound million 34.2 agütsütsü mulunga agizükogo.

Arishi küm 28 tain asayar ya Atletico-i tang transfer window nung alizükba asayar pezübuba asütsü. Kasa mapang nung tenangzüktepba nung shilem ka ama Spurs puri 15% sell-on clause meyipa agitsü.

Argentina nunger international asayar ya Premier League champions Arsenal puria alizükba liasü, saka Tottenham-i parnok indang captain ya Arsenal dang meyo knüi liasü.

Pa season pongu nung

asaya 156 nung asayaba sülen tang Tottenham toktsütsü. Tottenham nungi asayaba mapang pai goal 13 idaksüogo.

Centre-back nung asayaba asayar ya Argentina team World Cup final tonga asayaba nunga shilem agiogo. Pa asaya ka nung dang masaya.

Romero ya pre-season atema Spurs-i taruba hopta meyipa arutsü liasü.

Tottenham pur taoba season tera agi dang Premier League nungi metsüki asayaba mapang pa team captain liasü.

Atalanta nungi pound million 42.5 agi alizükba sülen Romero ya Spurs indang defence nung tongtibang asayar ka aküm aser 2025 küm Son Heung-

min-i club toktsüba sülen pa captain aküm.

Taoba season tatembangbuba asaya Everton den asayatsü lia Romero Argentina-i aoba ajanga club pusemertem kanga mepeladaksüi liasü, kechiyong parnok PL nung jenjang kanga mejungi liasü.

Kasa mapang nung defender Djed Spence-ia club toktsütsü lir. Pa Inter Milan-i aotsü atema sensaksemba mapang ka lir.

Midfielders Kang-in Lee aser Morten Hjulmand aser left-back Alejandro Grimaldo nunger alizükba den Romero alizükra Atletico puri pound million 100 dak tema entoktsü.

Xavi Hernandez Netherlands coach kümogo



Luroi/August 13, 2026 (Agencies): Taoba mapang Spain nunger nüngtugu football asayar Xavi Hernandez Netherlands tebur football team head coach asütsü shimogo. Pai Bodhbarnü küm pezü atema tenangzüktepba ka yangluogo.

Xavi-i iba mapa ya Ronald Koeman ket nungi melenzükogo, shibai Netherland pur taküm FIFA World Cup round of 32 nung tsükba sülen mapa tokja liasü. Xavi ya asaya aliba mapang 2010 küm World Cup akok aser 2008 aser 2012 küm European Championship-a kokogo.

Pa manager mapa mezüngbuba Qatari club Al Sadd nung inyak aser pa lenisüba nung Barcelona puri 2023 küm La Liga title bena liasü.

"Dutch national team head coach akümba atema ni kanga pelar. FC Barcelona academy anitetba asayar ka ama ni Johan Cruyff aser Rinus Michels nungeri kanga ajungmesogo aser ni Dutch football den tesendaktep balaka lir ama bilemer," ta Xavi-i ashi.

2024 küm Barcelona

toktsüba sülen Xavi-i tang mezüngbuba coach mapa ka agizükogo. Xavi ya 2021 küm November ita Koeman melena Barca indang coah aküm. Pa iba club nungi asaya 767 nung asaya liasü.

"Netherlands nung football sobaliba kanga takar lir aser nükjiongda tejangja lir, iba jagi ni atsüa aru. Parnoki possession dak ajemdaker attacking football asayaner, koba kü tejangraba den kasa lir," ta Xavi-i ashi.

Koeman melentsü atema taoba Liverpool head coach Arne Slot-a asadanga liasü, saka pa club football nung dang shilem aginer ta ashiba sülen toktsüogo.

"Kü indang career nung tangbo ni anogoshia training pitch nung kü asayartem den mapang entokner, koba national team ka denbo takoktsü masü," ta Voetbal International den jembiba mapang Slot-i ashi.

Austria nunger Ernst Happel sülen Xavi ya mezüngbuba bendanger coach asütsü. Happel-i aniba team yagi 1978 küm FIFA World Cup final tonga asayaogo.

BENDANGLI OSANG : Tapak 7 nungi...

Putin-i Japan asana mangatettep aliba asetkong...

Ibai Putin asoshi mezüng semdangba alitsü aser iba mapang pai asetkong nung Yasny fish-processing plant semdang aser Russia indang Far East nung navy drills repranga liasü.

Vesti TV channel ajanga noksa tem sayuba nung Putin ya suit tanak ka semer pa anasa langpang nung tuna ango tulu ana aser halibut yua liasü aser ketdangsür anati ango apuba aser ango tesem balala nung senzüba yimya indang jembia liasü. Pa ano tesem ka nung anena ango entzü chia liasü.

"Resort nung ama yangi tzüngsang kanga tajung lir!" ta Putin-i yangji alir nisung telok ka dang ashi.

Putin-i tawa Russia indang Siberia aser Far East nung region ishika semdanga lir. Pa Iturup-i marudang Sakhalin Island nung anena yangji Russia indang Pacific Fleet

ajanga drills agiba tatembangba shilem nung dena liasü.

Iba naval exercises nung shilem agiba warship ka nung mener jembidang, Kiril Islands ya international documents nung asadangsang zülua lir, ta Putin-i ashi. "Saka yangjia Russia-i Japan den peace treaty ka tembangtsü nükjiong nung lenmang bushitsü renema lir," ta pai ashi.

Tesüiba mapang Moscow-i ozü jenjang sen lirumedemtsü asoshi taoba ato kilonser Shinzo Abe densema Japan lenir aika den tesendaktep tajung yanglua aru, ta Russia leniri ashi. Japan aser Russia anasai bener arutsü atema Abe-i kanga inyakogo ta ashi.

Iba sülen Japan jenjang melenshiogo, ajisüaka Japan aser region nung tanga linüktem densema kidanger ajunga den amalitep akatsü Russia renema lir, ta Russia tiri ashi.

BIEMDANGANG

"Pei tangateba melenshiba ajanga pei alidak temelenshi bener arutsüteter."